

修訂日期: 2004/11/14 發行日期: 2006/2/15

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 21, No. 1365

原始資料: 蕭鎮國大德提供, 北美某大德提供

No. 1365 [No. 1366]

八名普密陀羅尼經

大唐三藏法師玄奘奉 詔譯

如是我聞。一時薄伽梵。在室羅筏住誓多林給孤獨園。與大苾芻眾千二百五十人俱。及無量無數菩薩摩訶薩。并諸天人阿素洛等。異類大眾前後圍遶。

爾時世尊告金剛手菩薩言。善男子汝所受持諸上明。呪神用威猛功業難成。雖後為益或初暫損。今有八名普密神呪。威德廣大事業易成。神用祕密始終無損。能受持者必獲利樂。當為汝說汝樂聞不。時金剛手歡喜踊躍。頂禮佛足右跪合掌。請言世尊唯願為說。

佛言諦聽極善思惟。吾今為汝分別演說。何謂八名普密神呪。一名功德寶藏。二名莊嚴象耳。三名善勇猛。四名勝諦雲。五名成熾然。六名微妙色。七名嚴飾。八名金剛。若有得聞此八名呪。於當來世經七俱胝那庾多百千大劫。不墮地獄傍生餓鬼。將命終時身心安隱。見有諸佛及諸菩薩來現其前。為說大乘甚深法要。既聞法已。必得往生觀史多天奉事彌勒。後隨彌勒下瞻部洲。行願漸增乃至究竟。陀羅尼曰。

頌[齒*來](擿界反已下同)筏[齒*來]捺[齒*來]謁刺[齒*來]蘇謎蘇摩蘇契薩縛迦摩娑達泥呬梨寐梨薛薛梨悉殿都謎薩縛迦摩娑馱室遮縵怛羅般陀莎呵

佛說如是普密呪時。八千俱胝諸惡神鬼。皆生歡喜捨離毒心。歸佛法僧斷惡修善。俱詣佛所發誠諦言。願常護持此大神呪。令受持者身心安樂。佛言善哉如汝所願若有善男子善女人。歸佛法僧及金剛手。能處閑靜堅修梵行。親近制多受持讀誦。所求善願無不皆得。乃至無上正等菩提。恒憶宿命無有忘失。

時薄伽梵說是經已。金剛手等一切菩薩。及諸天人阿素洛等。一切眾會聞佛所說。皆大歡喜。信受奉行。

八名普密陀羅尼經